

Protocol da la radunanza generala dals 7 december 2023, a las 20.30 illa chasa cumünala Misoch

Preschaints

Christian Poo, Jon Buchli, Andri Poo, Mario Rauch, Anna Barbla Buchli, Chasper Buchli, Elisabeth Sarott, Mischa Weiss, Tina Weiss, Corina Caviezel, Annatina Nuotclà, Armon Nuotclà, Men Caviezel, Nataglia Roner, Jan Sedlacek, Christina Sedlacek, Marianne Werro, Flurin Nuotclà, Reto Rauch, Roland Franziscus, Cristina Gregori, Andri Lansel, Peder Poo, Seraina Riatsch, Georg Salomon.

Tractandas

1. salüd dal president e s-chüsas
2. tscherna scrutinadurs
3. protocol da la radunanza generala 2022
4. rapport annual dal president
5. rapport da la chaschiera e dals revisurs da quint
6. rapports dal schef da cuorsa, schef da turas, delegià Traversada e Stafetta tras Sent
7. mutaziuns ed onurificaziuns
8. tschernas
9. fixar contribuziun annuala
10. program da l'on
11. varia

1. salüd dal president e s-chüsas

A las 20.35 po il president Christian Poo salüdar a 25 commembras e commembers. S-chüsats s'han la chaschiera Sabina Stricker, Cla Rauch, Monika Roner, Ruedi Bisang, Nienke Ebben, Michel Ebben, Christoph Weiss, Braida Pinggera, Marco Laurent, Lilo Mock, Gian Caviezel, Liz Taverna, Andri Taverna, Marta Filli, Marco Filli, Gianna Rauch Poo, Selina Poo, Romana Poo, Sara Rauch, Marina Buchli, Flurina Jann, Dumeng Jann, Flurin Weiss e Mario Riatsch.

Il president salüda als preschaints. El ha grond plaschair dal cumanzamaint da quist on. Culla bella naiv da la fin d'eivna passada, para la stagiun d'inviern fingià uossa dad esser salvada. Displaschaivelmaing ha il club stuvü tour cumgià d'ürant quist on da duos commembers da nos club fich activs.

Be 4 dis davo la radunanza 2022 es mort nos anteriur commember Cla Sarott. El nu d'eira mai in suprastanza dal club, ma ha sustgnü al club in fich bleras occasiuns: el ha fat ün'immensa lavur pro'ls ultims giubileums dal club, es stat il fundatur dal Super-G Champatsch, ha reactivà la Lavera e tut part a bleras cuorsas dal club e quai fin ill'ota età. Il president til ha cità ch'el haja fat quai fich jent „eir sch'el nu d'eira il meglder skiunz“, sco cha Cla solaiva svesch dir. El ha gnü grond plaschair da gnir avant pacs ons amo a la festa d'inauguraziun dal Cuvel da l'Iva chi til staiva fich a cour. Il president preschainta üna sequenza d'ün film cha Cla Sarott vaiva fat in occasiun dal giubileum da 75 ons Club skiunzs Sent.

Quista stà vaina lura stuvü tour cumgià dad ün oter commember da nos club fich activ, da la guida da muntogna e magister da skis Not Buchli. El d'eira ün fich bun skiunz ed ha manà varsaquantas gitas dal Club alpin svizzer e dal Club skiunzs Sent. Il president quinta ün'anecdota da sia prüma gita cul club. Not d'eira quella jada manader ed i sun its sül Piz Clünas. Bliers ons plü tard ha sia duonna eir fat sia prüma gita suot la guida da Not. A la gita dal Clünas vaiva fat part quella jada eir nos schef da cuorsa, Jon Buchli, il figl da Not. El d'eira quella jada be ün mattet e nu s'algorda plü tant da quista gita. Eir da Not vegnan muossadas alch fotografias ed ün cuort filmin chi d'eira gnü fat da la Televisiun Rumantscha.

La radunanza s'adoza per ün minut da silenzi in memoria dals duos trapassats.

L'invid es gnü tramiss tenor statüts, uschè cha la radunanza es abla da trar decisiuns.

2. tscherna scrutinadurs

Sco dombravuschs vain elet Mischa Weiss.

3. prelecziun dal protocol da la radunanza generala 2022

Il protocol da la radunanza generala 2022 es gnü tramiss insembel cul invid. El vain approvà sainza cuntravuschs.

4. rapport annual dal president

Il president rapporta davart l'on scuors, darcheu üna jada ün on regular, davo duos invernans per part „improvisats“ tras la situaziun da corona. Displaschaivelmaing ha mancà la naiv. Tras quai s'haja vis chi nun es plü pussibel da desister a la naiv artificiala. Grazcha a quella ha la Motta pudü avair avert tuot il territori d'ürant tuot il temp ed eir üna part da la loipa d'eira adüna disponibla in ün bun stadi.

El rapporta davart ils arrandschamaints dal club: il tir da tschoccas a Sur En (36 participants), las cuorsas dal club quista jada cun ün slalom gigantesc ed ün slalom adüna cun duos parcuors, la joslada oura Vastur (28 participants), la gita sü Niruns (7 participants), üna gita da skis, la Stafetta tras Sent, la Traversada e la gita da stà cun üna vainchina da participants. Pro la stafetta es gnüda organisada eir l'ustaria davart dal club. Implü han commembers dal club eir sustgnü pro'ls arrandschamaints: coppa mundiala da snowboard, Passlung Martina – Scuol, la cuorsa da ski alpinissem Mottup e cun far l'ustaria d'ürant ün concert da la musica da Sent.

Eir l'OJ da Nordic Scuol e l'OJ Motta Naluns vegnan sustgnüts da nos club.

Per finir seis pled ingrazcha il president a sia collega e seis collegas dal comité ed a tuot ils commembers per lur sustegn. El ingrazcha eir als sponsurs dals premis. El giavüscha a tuots ün bel invern sainza accidaints.

5. rapport da la chaschiera e dals revisurs da quint

Causa cha la chaschiera nun ha pudü esser preschainta pervi ch'ella es in vacanzas, preschainta Andri Poo il rendaquint da l'on scuors. Quist on serra giò il quint cun ün guadogn da CHF 1'393.35 CHF. Il chapital agen importa uossa CHF 32'482.68. Quist guadogn es fich allegraivel.

Il revisur Chasper Buchli ha revais il quint eir in nom da la revisura Braida Pinggera chi nu d'eira in val l'ultim temp. El prelegia il rapport. Il quint vain fat bun cun dar dis-charg als organs respunsabels.

In quist'occasiun vegna darcheu decis cha la suprastanza possa disponer d'ün import da CHF 1000.- chi sta illa cumpetenza da decider dal comité sves.

A la chaschiera pertocca ün ingrazchamaint per tuot sia lavur instancabla.

6. rapports dal schef da cuorsa, schef da turas, delegià Traversada e Stafetta tras Sent

Il schef da cuorsa Jon Buchli, rapporta davart la cuorsa dal club, quist on cun 2 parcuors da slalom e 2 parcuors da slalom gigantesc. 34 curraduras e curradurs han fat part dal slalom gigantesc, 15 dal slalom. 9 familias sun gnüdas rangadas illa categoria speciala. Il passlung es gnü clamà giò causa mancanza da participants. La rangaziun ha gnü lö darcheu sco üsità avant corona. El ingrazcha fich a Roland Franziscus chi piglia fingià daspö lösch il temp per nossas concorrenzas.

Il schef da turas, Andri Poo po comunicar chi s'haja pudü far d'ürant l'invern passà 1 tura. Causa la paca naiv s'haja fat üna skiada giò'n Tiral e s'es tuornà darcheu sülla Fuorcla Soèr e gnü giò Sent. La fermativa sü'l Cuvel da l'Iva nun ha naturalmaing pudü mancar. I s'han partecipadas 12 commembras e commembers. Quist invern esa darcheu previs da far duos gitas. Las datas provisoricas sun publicadas sü'l plan da l'on. In cas da spostamaints gnissan quels publicats illa chaistina chi's rechatta dadaint l'entrada dal Sport Champatsch.

Reto Rauch rapporta davart la Traversada. Adonta cha'l nouv persunal da la Sesvenna nu's d'eira consciant da la grondezza da l'arrandschamaint cur cha'l comitè da la Traversada ha tut sù la prüma jada contact cun els, haja funcziunà tuot finalmaing fich bain ed id han gnü grond plaschair illa Sesvenna da bivgnantar als partecipants da nossa Traversada. A partir dals 1. marz s'haja dat la pussibilità da s'annunzchar pella Traversada, 2 eivnas davò d'eira fingià raggiunt la limita. Causa cha singuls han amo clamà giò, s'haja pudü resguardar finalmaing eir annunzchas plü tard. Als 5 lügl 2025 varà lö lura la Traversada da giubileum, la 20avla. Dal 2024 varà lö darcheu la traversada dal Vnuost.

Nataglia Roner preschainta il rapport da la Stafetta tras Sent. La 40avla Stafetta tras Sent, la stafetta da giubileum es gnüda organisada in ün'otra fuorma. I s'ha darcheu fat tragets cuorts per promover eir a famiglias cun uffants pitschens. Minchün ha però stuvü cuorrer duos tragets. Quai ha plaschü a blers fich bain, eir schi nu's savaiva ouravant che chi's spetta. I s'han partecipadas 20 squadras. Ella ingrazcha implü a tuot quellas chi han fat tuortas pell'ustaria, a Roland Franziscus chi piglia il temp, a Peder Poo chi'd es adüna inclur a verer chi nu detta „sbotschs“ cun autos, sco eir a las samaritanas Nesa Caviezel ed Ivonne Taverna chi füssan quia per cas urgaints.

7. mutaziuns ed onurificaziuns

Sco novs commembers vegnan bivgnantadas las seguintas personas: Juri Ebben, Daniel Taverna e Valeria Benderer.

Sortidas nun haja dat ningünas.

Cristina Gregori, Georg Salomon, Men Caviezel e Johann Martin Taverna dvaintan commembers libers causa ch'els sun fingià daspö 40 ons commembers dal Club skiunzs Sent.

Daspö 25 ons commembra e veterana dvainta Liz Taverna.

8. tschernas

Tenor statüts ston gnir reelets d'ürant ils ons dispêrs l'actuar e'l schef da cuorsa. Jon Buchli e Mario Rauch as mettan a disposiziun per ün'ulteriura perioda d'uffizi e vegnan reelets cun applaus. Sco revisurs da quint vegnan confermats Braida Pinggera e Chasper Buchli.

Uschè as cumpuona il comitè inavant seguaintamaing:

president:	Christian Poo
actuar:	Mario Rauch
chaschiera:	Sabina Stricker
schef da cuorsa:	Jon Buchli
schef da turas:	Andri Poo

revisurs da quint: Braida Pinggera e Chasper Buchli

9. fixar contribuziun annuala

La contribuziun annuala vain fixada sün CHF 25.- per personas sainza commembranza da Swiss-Ski. Ils commembers cun commembranza da Swiss-Ski pajan CHF 50.-.

10. program da l'on

Il program da l'on es gnü protramiss e vain preschantà dal president. El manzuna cha novas ideas sajan adüna bainvissas e dëssan gnir dattas inavant ad el.

11. varia

Andri Poo surdà in nom dal Club skiunzs Sent al president cun ün on retard ün regal da recugnuschentscha cun quai cha quel fa part uossa fingià 20 ons, o apunta 21 ons, a la suprastanza dal Club skiunzs Sent, da quels 17 sco president. I segua ün fich grond applaus da la radunanza chi recugnoscha uschè il grond lavur da Christian.

Il president manzuna cha'l comitè haja decis da sustgnair inavant eir a giuvenils chi nu sun aint ill'organisaziun RPN e sun in otras estructuras organisadas cun imports congualabels da

quels chi s'ha pel RPN. Da quist sustegn profitan pel mumaint Valeria Benderer, Marina Benderer, Isai Näff, Noe Näff e Flurina Rauch. Quai as prevezza eir da far inavant, scha las finanzas permettàn quai. Eir a Samyr Afroukh s'haja vuglù far ün plaschair cun dar üna contribuziun pella carta da skis e pussibiltar da far ün sport ch'el fa fich jent cun sustegn, adonta da seis impedimaint. Il listess as vaiva previs da far per Sina Cantieni. La famiglia da Sina ha giavüschà da dar inavant quista contribuziun implü a Samir.

A Cla Rauch ingrazcha il president per sia lavur da comunicaziun culla pagina d'internet e surdà ün regal per arcugnoscher quista lavur. Roland Franziscus survain ün regal per seis sustegn sco tempader. Silvio Andrighetto e Silvio Vital han sustgnü als OJ's sco trenaders e survegnan eir ün pitschen preschaint dal president.

Il president rapporta davart sia preschentscha a la radunanza da l'Associaziun grischuna da skis a Puntraschigna.

Andri Linsel manzuna cha la Motta Naluns doza il chapital d'aczias e vess gust scha ün o tschel segness üna o plüssas aczias per ün'instituziun uschè importanta per nosssa regiun e per nos sport. El surdà als interessents ün prospect in chosa.

Elisabeth Sarott ed Anna Barbla Buchli ingrazchan pels bels plets in occasiun da la mort da lur homens barmörs.

A las 22.00 serra il president la radunanza ed ingrazcha a tuots pella preschentscha.

L'actuar

Mario Rauch